

Brev a mes commembers en vischnaunca (5)

Cars amitgs

Nus essan anavos en baselgia, malgrad ch'el virus da corona smanatscha aunc adina. Mond en baselgia suandein nus rigurusamein las prescripziuns dalla regenza per impedir che la malsogna sederasi danovamein.

Ei dat differentas sorts da suffrientscha sil mund. Da quellas ei la suffrientscha dils senza cuolpa per ins il pli nuncapeivel. Bia religiuns emprovan da rispunder a quella damonda sin differentas modas. L'entira ductrina da Buddha seconcentrescha effectivamein sin il pitir e la via co surmontar la dolur. Sia ductrina vegn resumada en las quater noblas verdads. Quellas ein: 1. La veta exista ord suffrientscha, dolur e paupradad. 2. Quei suffrir deriva dil desideri egoistic e persunal. 3. Igl egoismus san ins surventscher. 4. La via nobla che sepaga otg dublamein ei la via per surmontar il pitir. La via dad otg parts ei – la dretga veta, la dretga intenziun, il dretg lungatg, il dretg agir, la dretga subsistenza, la dretga stenta, la dretga atenziun e la dretga concentrasiun. Sch'ina persuna capescha ed exequescha quellas indicaziuns contonscha ella la liberasiun.

Il cudisch da Hiob ord il vegl testament relata grondiusas relaziuns el pitir dils nunculponts. Hiob ei staus in bien, gest e reh um che suandava ils condaments dil signur. In di piarda el tut ed ils carstgauns sgomian el e supplicheschan al da renunziar alla cardientscha da Diu.

Il cudisch entscheiva aschia che nus enderschin dad in gest cun num Hiob che viveva ella tiara dad Uz. Sche Dieus lauda las vertids da Hiob sche pretenda Satan ch'el seigi aschi fideivels perquei che Dieus hagi benediu el cun tut. Dieus suspenda Hiob dil schurmetg aschia che lez piarda sia rihezia, ses affons e sia sanadad corporala. Cheu supplicheschan sia dunna e treis amitgs el da dar si la confidonza en Diu. Malgrad ch'el smaletescha il temps da sia naschientscha e la situaziun momentana tschontscha el mai dil mal sur da Diu. Duront ch'el pitescha en sia miseria annunzia el che Dieus seigi siu sulet scazi. Forsa haveis Vus udiu il renomau proverbi che nus havein legiu all'entschatta dalla celebrazion da sepultura: «Nius sun jeu sortius dil best da mia mumma, nius retuornel jeu anavos leu. Il Segner ha dau, il Segner ha priu, siu num seigi benedius». (Hiob 1:21).

Ils amitgs da Hiob han ris sur da sia fideivladad viers Diu e dau buns cussegls pertuccont siu pitir. Dieus cumpara a Hiob en in turmeigl duront ch'el stat avon Diu e sesprova da capir la veglia da Diu. Quei dat senn e finamira per sia veta era sch'el capescha buca tut. Dieus remunerescha puspei el cun dapli rihezia che antruras e sevila cun ses amitgs. Cheu sa mo Dieus dar risposta sin tuttas damondas. La presenza da Diu en sia veta ei la risposta sin tut siu pitir.

Nus havein ina megliera risposta per nus el Cristus crucifigau. Dieus parta sia veta e pren part da nies pitir. Sia crusch ei per nus il segn da speronza cura ch'el ha surmontau sia mort entras sia levada. Era sche nus havein buca ina risposta sin tut las damondas ha tut quei che capeta en nossa veta in senn. Tgei che nus savein far ei ei haver confidonza e dependenza en Diu en nossa veta. Lein haver fidonza ella providientscha da Diu cun far quei che Dieus ha confidau a nus. *Ludaus sei Jesus Cristus. Semper sei ludaus.* Amen.